

**UNIVERZITET U SARAJEVU**  
**FAKULTET POLITIČKIH NAUKA**  
**INTERDISCIPLINARNI DOKTORSKI STUDIJ**

**Komisija za ocjenu doktorske disertacije kandidata mr. sc. Elvedin Mulagić**

Sarajevo, 14.02.2023. godine

**VIJEĆU FAKULTETA UNIVERZITETA U SARAJEVU**

**Izveštaj o ocjeni doktorske disertacije kandidata mr. sc. Elvedin Mulagić**

Na osnovu člana 59. tačka m) Statuta Univerziteta u Sarajevu, a u skladu sa odredbama članova 59, 36, 40, 41, 42. i 43. Pravila studiranja za treći ciklus studija na Univerzitetu u Sarajevu, Senat je na 52. redovnoj sjednici održanoj 30. novembra 2022. godine donio odluku broj 01-19-161/22 o obrazovanju Komisije za ocjenu radne verzije doktorske disertacije kandidata mr.sci. Elvedina Mulagića pod naslovom „Zločini počinjeni na području općine Zvornik u periodu 1992-1995. sa posebnim osvrtom na zločine protiv čovječnosti“ u sastavu:

1. Prof. dr. Sead Turčalo, vanredni profesor, predsjednik komisije,
2. Prof. dr. Zarije Seizović, redovni profesor, mentor i član,
3. Prof. dr. Izet Beridan, profesor emiratus, član.

Dana 10. januara 2023. godine zakazana je i održana na Fakultetu političkih nauka Univerziteta u Sarajevu prezentacija radne verzije doktorske disertacije kandidata mr. sc. Elvedina Mulagića pred Komisijom u sastavu:

1. Prof. dr. Sead Turčalo, predsjednik komisije,
2. Prof. dr. Zarije Seizović, član i mentor,
3. Prof. dr. Izet Beridan, član.

Prilikom prezentacije radne verzije doktorske disertacije članovi Komisije su dali sugestije i opaske za korigovanje pojedinih segmenata radne verzije disertacije a Komisija je jednoglasno usvojila odluku sa sugestijama za izmjene i dopune rada o čemu je sačinjen zapisnik o prezentaciji radne verzije doktorske disertacije kandidata Elvedina Mulagića. U



skladu sa sugestijama članova Komisije kandidat je izvršio korigovanje radne verzije disertacije nakon čega je kandidat predao Fakultetu korigovanu verziju doktorske disertacije u predviđenom roku, a na osnovu čega je od strane Univerziteta u Sarajevu izvršena provjera putem softvera za detekciju potencijalnog plagijarizma.

Nakon dobivenog rezultata provjera primjenom softvera za detekciju potencijalnog plagijarizma, Komisija je dana 14.02.2023. godine izradila Izvještaj za ocjenu doktorske disertacije/izvještaj komisije za ocjenu i odbranu doktorske disertacije kojim je prihvaćena konačna verzija doktorske disertacije.

### **1. Osnovni podaci o kandidatu**

Elvedin Mulagić rođen je 1971. godine u Mokrinama, općina Hadžići. Diplomirao je 2002. godine na Fakultetu političkih nauka u Sarajevu. Na istom fakultetu je i magistrirao 2013. godine na temu "Poricanja genocida nad Bošnjacima počinjenog u periodu 1992-1995." pod mentorstvom prof. dr. Smaila Čekića. Tokom međunarodnog oružanog sukoba u Bosni i Hercegovini kao pripadnik Armije RBiH odlikovan je najvećim ratnim priznanjem „Zlatni ljljan“. Profesionalno je angažovan u Oružanim snagama Bosne i Hercegovine u činu brigadira. Tokom 2013. i 2014. godine učestvovao je kao pripadnik Oružanih snaga Bosne i Hercegovine u mirovnoj misiji UN-a u DR Kongo kao vojni posmatrač. Tokom vojne karijere više puta je učestvovao na raznim međunarodnim konferencijama i seminarima iz domene odbrane i sigurnosti, kako u zemlji tako i u inostranstvu. Kandidat je učešćem na pomenutim događajima, pored sticanja znanja i vještina is segmenta sigurnosnih i mirovnih studija, stekao i odgovarajući nivo (*intermediate*) poznavanja engleskog jezika. Kandidat je bio učesnik međunarodne naučne konferencije „Srebrenica 1995-2015: Evolucija nasljeđa i dugoročnih posljedica genocida“, održane 2015. godine u Sarajevu, Tuzli i Srebrenici. U ulozi spoljnog saradnika Instituta za istraživanje zločina protiv čovječnosti i međunarodnog prava, Univerziteta u Sarajevu, ostvarivao je kontakte, posjete i razmjenu iskustava sa Centrom za istraživanje genocida iz Kigalija u Ruandi.

Kandidat je autor knjige *Negiranje genocida nad Bošnjacima*, objavljene 2015. godine od strane Instituta za istraživanje zločina protiv čovječnosti i međunarodnog prava Univerzieta u Sarajevu i koautor knjige *Hadžići tokom agresije na Republiku Bosnu i Hercegovinu 1992-1995* (Zilha Mastalić Košuta, Vahid Alađuz i Elvedin Mulagić), Instituta



za istraživanje zločina protiv čovječnosti i međunarodnog prava Univerziteta u Sarajevu i Općine Hadžići 2022. godine.

Autor je sljedećih naučnih radova:

- „Osvrt na knjigu Dobrice Ćosića - Negiranje genocida nad Bošnjacima i nastavak kontinuiranog rada na oživotvorenju projekta 'Velika Srbija'“ u: *Ćosićev rat*, Smail Čekić (ur.), Institut za istraživanje zločina protiv čovječnosti i međunarodnog prava Univerziteta u Sarajevu, Sarajevo, 2012.
- „Negiranje genocida nad Tutsima i genocida nad Bošnjacima – komparativni prikaz“ u: *Srebrenica 1995-2015: Evolucija nasljeđa i dugoročnih posljedica genocida*, Fikret Bećirović i Džananović Muamer (ur.), Institut za istraživanje zločina protiv čovječnosti i međunarodnog prava Univerziteta u Sarajevu, Sarajevo, 2016.
- „Primjena UN doktrine 'Odgovornost za pružanje zaštite' i zločini nad Rohinja narodom u Mijanmaru“, *Context*, br. 8.2, Centar za napredne studije, Sarajevo, 2021.

## 2. Osnovni podaci o doktorskoj disertaciji

### a. Problemsko područje

Kandidat je u doktorskoj disertaciji integralno istražio teške povrede međunarodnog humanitarnog prava počinjene izvršenjem zločina na prostoru općine Zvornik u periodu od 1992-1995. godine, sa ciljem utvrđivanja naučne i historijske istine. Glavni konstituenti disertacije bili su utvrđivanje oblika, načina, intenziteta i razmjera izvršenja zločina, uz primaran fokus na ubijanje, zatočenje, mučenje, deportacije i prisilno protjerivanje, silovanje, progon i druge zločine, sa posebnim osvrtom na zločine protiv čovječnosti. Istraživanjem su utvrđene činjenice o masovnim i pojedinačnim zločinima počinjenim nad zaštićenim licima.

### b. Istraživačko pitanje i hipoteze istraživanja

Doktorska disertacija ima(la je) za cilj dati odgovor na pitanje: *Da li su na području općine Zvornik u periodu 1992-1995. godina izvršeni različiti oblici ratnih zločina<sup>1</sup>*

<sup>1</sup> *Ratni zločini* je sintagma koja se koristi da, u općem (generalnom) smislu označi sve kategorije zločina protiv vrijednosti zaštićenih međunarodnim pravom (genocid, zločini protiv čovječnosti, povrede zakona i običaja ratovanja, povrede Ženjskih konvencija i dr.).



*uključujući i zločine protiv čovječnosti, koji do sada nisu bili predmet postupaka pred nadležnim međunarodnim i domaćim sudovima i (ili) nisu bili predmet naučnog istraživanja?*

### **Generalna hipoteza**

Na području općine Zvornik u periodu 1992.-1995. godine izvršeni su različiti oblici ratnih zločina nad zaštićenim licima, kao i masovna razaranja i uništavanja zaštićenih objekata, uključujući i zločine protiv čovječnosti, koji ispoljenim načinima, oblicima, masovnošću razmjera i jedinstvenim obrascem izvršenja, iako to nije utvrđeno presudama nadležnih domaćih i međunarodnih sudova, indiciraju da je genocid nad Muslimanima<sup>2</sup> od strane političkih, vojnih, policijskih i sigurnosnih struktura Srbije i Crne Gore<sup>3</sup> i Republike Srpske<sup>4</sup> počinjen na području širem od područja Srebrenice.

### **c. Metodološki pristup**

Disertacija je izrađena na osnovu provedenog empirijskog istraživanja. U istraživanju su primjenjene tri općenaučne metode: statistička, metoda modelovanja i hipotetičko-deduktivna metoda uz istovremenu primjenu faznih komparacija, te historijski metod i metod analize sadržaja. Svojstva društvene pojave i njena složenost nametnula su primarno dvije metode prikupljanja, odnosno pribavljanja podataka i to ispitivanje kao najprodorniju metodu prikupljanja podataka i metodu analize sadržaja relevantnih dokumenata. Kao dio tehnike metode ispitivanja primijenjeni su usmjereni orijentacioni intervju. Naizbježan i vrlo koristan

<sup>2</sup> Nominacije u presudama MKSJ su takve da je žrtva određena kao „bosanski Muslimani“ (*Bosnian Muslims*), što u prevodu može stvoriti zabunu po pitanju zaštićene grupe. Naime, na engleskom jeziku se vjeroispovjest piše uvijek velikim slovom, pa je, na engleskom jeziku tekst presude takav da se smatra da je zaštićena grupa religijska (bosanski muslimani). No, na bosanskom (ranije srpsko-hrvatskom) jeziku, velikim slovom se piše nacionalna a malim religijska odrednice (Musliman/musliman), što stvara zabunu po pitanju zaštićene grupe. Za potrebe ovog rada, grupa će biti određena kao bosanski muslimani ili bosanski Muslimani ili čak Bošnjaci, s tim da valja istaći da je posljednja kategorija uvedena Ustavom iz Daytonu i da se ona ne poklapa potpuno sa terminom *bosanski muslimani/Muslimani*.

<sup>3</sup> U ovom radu će se standardizovano koristiti termin Srbija i Crna Gora, umjesto naizmjeničnog korištenja više različitih termina. U periodu koji je prethodio oružanom sukobu u Bosni i Hercegovini i tokom početka sukoba kao akteri se pojavljuju Srbija i Crna Gora, tadašnje republike Socijalističke Federativne Republike Jugoslavije. Također se u tom periodu kao akteri pojavljuju nekadašnje institucije Socijalističke Federativne Republike Jugoslavije koje su bile pod apsolutnom kontrolom pristaša projekta „Velika Srbija“. Potom, 27. aprila 1992. godine, formiraju Srbija i Crna Gora Saveznu Republiku Jugoslaviju, da bi 2003. godine, isti subjekti formirali državnu zajednicu Srbija i Crna Gora. Državna zajednica Srbija i Crna Gora je prestala da postoji nakon proglašenja nezavisnosti Crne Gora 2006. godine.

<sup>4</sup> Pod pojmom „Republika Srpska“, u ovom radu, podrazumjevamo samoproglašenu Srpsku Republiku u Bosni i Hercegovini, formiranu 1992. godine, koja je zatim promjenila svoj naziv u „Republika Srpska“, a koja je egzistirala u ovoj formi do kraja oružanog sukoba u Bosni i Hercegovini 1995. godine, odnosno do potpisivanja Dejtonskog mirovnog ugovora.



metod bio je i metod opservacije, odnosno, sistematsko i precizno naučno posmatranje. Metod studije slučaja je upotrebljen jer je tako nalagala sama tema doktorske disertacije.

Nakon što je završeno prikupljanje podataka, a prije njihovog unosa i obrade, izvršena su poređenja (komparativni metod) podataka pribavljenih metodama ispitivanja, posmatranja i analize sadržaja dokumenata, s ciljem utvrđivanja istinitosti sadržaja do kojeg se došlo primjenom različitih metoda prikupljanja podataka.

Osnovna intencija u ovom istraživanju zasnivala se na potpunosti, vjerodostojnosti i istinitosti podataka, na osnovu kojih je jedino bilo moguće doći do saznanja koje će dobiti status naučnog saznanja, odnosno naučne istine.

#### **d. Ciljevi istraživanja**

Sem društvenog značaja istraživanja, čiji su ciljevi opštedruštvenog karaktera jer opisuju zbilju određenog temporalnog i geografskog repera, istraživanje je imalo i naučne ciljeve. Naučno otkriće kao treći po redu naučni cilj istraživanja (prethodno je to naučna deskripcija i naučna klasifikacija), postavljen u projektu disertacije, ostvaren je jer su postojeća segmentarna naučna saznanja o predmetu istraživanja značajno produbljena i proširena. Primjenom naučne eksplikacije utvrđeno je postojanja naučnih saznanja o postojanju kauzalne, uzročno-posljedične veze (*causalni nexus*) predmeta istraživanja i zločina počinjenih u drugim općinama u regiji Podrinja i da postoje određene prepoznatljive pravilnosti u izvršenju pojedinih zločina. Na osnovu pribavljenih, sredenih i obrađenih podataka izvršena je naučna klasifikacija i tipologizacija zločina po relevantnim obilježjima (bitni elementi bića krivičnih djela, svojstvima i posljedicama. Naučno saznanje stečeno ovim naučnim istraživanjem moglo bi, također, limitirano biti u funkciji utvrđivanja dijela istine o dešavanjima naznačenog geografskog i vremenskog okvira te kreiranja pretpostavki za oprost i pomirenje među etničkim grupama u Bosni i Hercegovini, te izgradnje, očuvanja i razvoja trajnog mira i funkcionalne države i društva.

#### **e. Teorijski okvir i pregled literature i izvora**

U izradi doktorske disertacije kandidat je koristio preko 100 bibliografskih jedinica i 12 arhivskih fondusa. Korištena literatura predstavlja širok spektar relevantnih izvora saznanja, dok su arhivski fondusi omogućili detaljnu elaboraciju zločina i događaja koji do



tada nisi bili istraženi ili su bili djelimično rasvijetljeni. Naučnoj relevantnosti doktorske disertacije posebno doprinosi ekstenzivno oslanjanje na dokumente i svjedočenja iz fundusa presuda MKSJ.

#### **f. Obrazloženje strukture disertacije**

- U prvom poglavlju kandidat je elaborirao pripreme za izvršenje zločina na području općine Zvornik, opšte socialno-ekonomsko i političko stanje u Zvorniku, Bosni i Hercegovini i Jugoslaviji osamdesetih i početkom devedestih godina XX stoljeća te predstavio uloge državnih organa Srbije i Crne Gore i paradržavnih institucije u Bosni i Hercegovini u pripremi za zauzimanje Zvornika i izvršenje zločina.
- Drugo poglavlje je obuhvatilo važan segment završnih priprema za zauzimanje Zvornika, i izvršenje zločina u gradu Zvorniku i njegovim prigradskim naseljima.
- Treće poglavlje se odnosi na istrebljenje i progon Muslimana iz sjeverozapadnog područja Zvornika, karakteriziran masovnim prisilnim protjerivanjem, progonom stanovništva ali i izvršenjem više masovnih zločina, među kojima i izvršenje najvećeg masovnog zločina – zločina u Bijelom Potoku sa brojem žrtava između 650 i 700 - ubijenih i nestalih.
- U četvrtom poglavlju predstavljeno je sistemsko nametanje mjera za istrebljenje Muslimana Kamenice, Snagova, Liplja i Glodi u periodu 1992 - 1993, čija je karakteristika bila mnogostrukost oblika izvršenja zločina.
- Peto poglavlje predstavlja okosnicu rada i u njemu je izvršena sinteza rezultata dobijenih u predhodnim poglavljima kroz elaboraciju posebno počinjenih zločina protiv čovječnosti, ali i predstavljanje pojedinih zločina protiv čovječnosti koji nisu bili predmet elaboracije u ostalim poglavljima.

### **3. Ocjena doktorske disertacije**

Rezultati istraživanja kojim se bavi kandidat sadrže i originalni naučni doprinos predmetne doktorske disertacije koji se ogleda u tome što je kandidat utvrdio, da su zločini počinjene na području općine Zvornik u periodu 1992-1995. godina izvršeni kao dio master plana realizacije srpskog velikodržavnog projekta u Bosni i Hercegovini te da su, prema prikupljenim i analiziranim podacima, obrasci (radnje izvršenja) različitih zločina temelj za postavljanje teze da je genocid, kao najstrašniji zločin, počinjen na teritoriji široj od opštine



Srebrenica, što, nažalost, nije utvrđeno i presudama MKSJ i nacionalnih sudova. Ovi rezultati tako spadaju u domen tzv. historijske, ne forenzičke (sudske) istine, čime njihov značaj nikako nije umanjem, osobito u svijetu politološko-socioloških uvida.

U svrhu realizacije srpskog velikodržavnog projekta, odnosno zločinačkog projekta na području općine Zvornik, formirani su u bosanskohercegovačkom Podrinju i Zvorniku krajem 1991. i početkom 1992. godine paradržavni organi regionalnog i lokalnog karaktera, kao osnovno preduslov za izvršenje planiranih zločina. Formiranje paradržavnih institucija je operacionalizovano je od strane rukovodstva SDS BiH uz pomoć i usmjeravanje od strane Slobodana Miloševića i njegovih saradnika iz Srbije, odnosno rukovodstva velikosrpskog projekta. Pomenuti akteri su osmislili, isplanirali i organizovali naoružavanje SDS formacija u Podrinju i Zvorniku isporukama velikih količina naoružanja iz Srbije i magacina JNA iz Bosne i Hercegovine. Upravo u ovom segmentu rukovodilaca i aktera uspostave paradržavnih institucija i naoružavanje SDS formacije u Podrinju i Zvorniku, u odjeljku koji obrađuju strukturu rukovodstva projekta, kandidat nam je ponudio obilje dokaza i činjenice koje to rasvjetljuju na jedan potpuno novi način.

Kandidat uspješno sintetizuje da je treći strateški cilj Skupštine „Srpskog naroda u Bosni i Hercegovini“, eliminisanja kompletnog muslimanskog stanovništva 50 km uz lijevu obalu Drine, predstavljao i master namjeru za istrebljenje i/li protjerivanje muslimanskog naroda Zvornika. Ali s druge strane, kandidat analizom veoma ekstenzivne i bržljivo sistematizovane i analizirane dokumentarne građe, argumentovano utvrđuje postojanje namjere za istrebljenje i djelimično uništenje bosanskih Muslimana Podrinja i Zvornika znatno prije usvajanja *Šest strateških ciljeva*, što je ujedno dokaz da pomenuti ciljevi predstavljaju velikosrpske strateške ciljeve u Bosni i Hercegovini koji i danas imaju svoje eksponenta sa obe strane rijeke Drine.

Krucijalno je naučno otkriće autora da su pripremama i izvršenjem zauzimanja Zvornika u potpunosti su rukovodili akteri iz Srbije koji su za tu svrhu upućeni u Zvornik i Mali Zvornik. U vojnom „naletu“ paravojnih jedinica i drugih formacija počinjeni su zločini masovnog razmjera u prvoj polovini aprila 1992. u gradskom dijelu i prigradskim naseljima Zvorniku. U periodu od izvršenja okupacije pa do konačnog progona Muslimana iz gradske jezgre Zvornika, Muslimanima tok kraja su uskraćivana snovna ljudska prava, prema njima je vršeno različito fizičko i mentalno nasilje: maltretiranje, zatočenja, silovanja, mučenja, deportacije, prisilno raseljavanje, ubijanje i druga nečovječna djela koja predstavljaju radnje izvršenja različitih ratnih zločina.



Kandidat pravi jasnu distinkciju između rukovođenja zločinima od početka zauzimanja Zvornika do kraja aprila 1992. godine, konstatujući da od kraja aprila - kada se zločini težišno vrše u zvorničkim selima naseljenim muslimanskim stanovništvom - rukovođenje zločinom od aktera iz Srbije preuzimaju organi Srpske RBiH i „Srpske opštine Zvornik“. Ovu tezu činjenično potkrjepljuje dokazima da na osnovu izdatih smjernica i direktiva sa najvišeg vojnopoličkog vrha SrRBiH, a u skladu sa trećim velikosrpskim strateškim ciljem u Bosni i Hercegovini, nelegalne institucije i komandanti na regionalnom i lokalnom nivou dodatno operacionaliziraju izvršenje zadatka „etničkog razdvajanja“ i „čišćenja“ pojasa uz Drinu. Ovo je u praksi značilo masovno ubijanje i zatočenje fertilnog muškog dijela Muslimana i prisilno protjerivanje žena, djece i starih osoba, što doživljava kulminaciju ubijanjem između 650 i 700 odraslih muškarca u zločinu „Bijeli Potok“. Pored prisilnog protjerivanja Muslimana Zvornika izvršena je deportacija Muslimana sjevernih zvorničkih prigradskih naselja i sela su krajem juna i početkom jula mjeseca preko Srbije u treće zemlje. Dokazi o počinjenom zločinu deportacije zvorničkih Muslimana sa pomenutog područja pouzdano ukazuju učešće aktera sa svih nivoa strukture koja je rukovodila realizacijom velikosrpskog projekta u Bosni i Hercegovini, a što je uključivalo vojnopoličko rukovodstvo SrRBiH, SDB Srbije, vojnopolicijske snage „Srpske opštine Zvornik“, Crveni krst Srbije i druge aktere iz Srbije.

U svrhu realizacije velikosrpskih strateških ciljeva formiran je sistem koncentracionih logora Srpske RBiH (danas Republike Srpske) u Zvorniku koji je sastojao od logora privremenog i stalnog tipa čije formiranje je naloženo s najvišeg vojnog vrha Vojske Srpske RBiH. Kroz zvorničke logore prošlo je hiljade Zvorničana Muslimana, kao i Muslimana iz drugih djelova Bosne i Hercegovine. Pored zločina ubijanja, u logorima je počinjeno mučenje, silovanje i drugi oblici zločina protiv čovječnosti. Mučenje zatočenika je provođeno s namjerom da se prouzrokuje velika patnja ili ozbiljne povrede tijela ili mentalnog zdravlja čime su počinjena druga nehumana djela kao zločini protiv čovječnosti.

U periodu od aprila 1992. godine do marta mjeseca 1993. godine Muslimani južne zvorničke teritorije podvrgavani su sistematski različitim oblicima zločina među kojima su najveće razmjere imale slijedeće radnje: ubijanje, zatočenja, mučenje, progon, istrebljenje, silovanje i drugi oblici (radnje izvršenja) zločina protiv čovječnosti. Civilno stanovništvo je kontinuirano podvrgavano granatiranju, a posljedično ubijanju i ranjavanju. Od početka 1993. godine zločine nad stanovništvom ovog područja vrše združne vojnopolicijske snage SR Jugoslavije – vršeći time i agresiju protiv Republike Bosne i Hercegovine - i „Republike




Srpske“ u sklopu namjere za djelimičnim uništenjem Bošnjaka donjeg Podrinja. Stanovništvo koje je preživjelo pomenute kontinuirane zločine na južnoj zvorničkoj teritoriji biva sabijeno u Srebrenicu i u konačnosti postaje žrtvom genocida u Srebrenici i oko nje 1995. godine. Ovo je ujedno i pouzdan indikator koji daje mjesta tvrdnji da je genocid nad Muslimanima počinjen na području širem od područja Srebrenice, jer su Muslimani južne zvorničke teritorije tokom 1992. i 1993. godine, koja je bila dijelom enklave Srebrenica-Žepa, bili podvrgnuti mjerama usmjernim na njihovo djelimično uništenje.


#### 4. Mišljenje i prijedlog komisije


Doktorska disertacije kandidata mr. sc. Elvedina Mulagića predstavlja značajan i originalan doprinos naučnoj, politološkoj-sigurnosnoj komponenti, ali i doprinos sociološkoj, pravnoj, kriminološkoj, psihološkoj i i historijskoj teoriji, budući da je riječ o istraživanju koje je kombiniralo saznanja koja, po prirodi, spadaju u domen nabrojanih naučnih disciplina. Kandidat je u izradi doktorske disertacije pokazao da je savladao odgovarajuće metode naučno-istraživačkog rada, te da posjeduje sposobnost naučne teorijske i empirijske analize predložene teme i izvođenja relevantnih i meritornih naučnih zaključaka.

Na temelju iznesenog, Komisija predlaže Vijeću Fakulteta političkih nauka Univerziteta u Sarajevu da se ovaj izvještaj o ocjeni doktorske disertacije kandidata mr. sc. Elvedina Mulagića na temu „**Zločini počinjeni na području općine Zvornik u periodu 1992-1995. sa posebnim osvrtom na zločine protiv čovječnosti**“ usvoji, te da se zakaže javna odbrana disertacije.

K o m i s i j a:

  
\_\_\_\_\_  
Prof. dr. Sead Turčalo, predsjednik

  
\_\_\_\_\_  
Prof. dr. Zarije Seizović, član i mentor

  
\_\_\_\_\_  
Prof. dr. Izet Beridan, član